

ጳውሎሲ ቆሮንቶሴ አሳሰ ጳፊዳ ናምኣንሉ ኪታ ጊዶ ቆፋ

ጳውሎሲ ቆሮንቶሴ አሳሰ ናምኣንሉ ኪታ ጳፊዳ ጋሶይካ ቆሮንቶሴን ዲዛ ዋሳ ኬላይራ ኢዛሰ ዲዛ ጋይቶቴላይ ዳሮ ሎኦንታ ጊሻሳ። ኢሲ ኢሲ አማኒዛ አሳቲ ዳጺዛ ካጼ ቃላታ ኢዛ ቦላ ሺሺኮካ ጳውሎሲ ኢሰታራ ጊጋናሰ ኬሂ ኮጹዳይሳ ቤሴሰ፤ ኢዚ ኢሰታራ ጊጊኮ ኢዛሰ ጊታ ኡፋይሲ ሲዬታናይሳ ቆንጨሴሰ።

ባ ጳፊዳ ኮይሮ ኪታ ቦላ ጳውሎሲ ቆሮንቶሴን ዲዛ ዋሳ ኬላይራ ኢዛሰ ዲዛ ጋይቶቴላ ቆንጨሴላን ሄ ዋሳ ኬላይን ዴንዲዳ ቦሮ ዮኦዛሲኔ ኢሰታ ኤቄቴላሰ ኣይሰ ኢዚ ሚኖ ዛሮ አሚዳኮ ኤሪሴሰ። ኢዚ ሄሳራ ኢሲ ቦላ ጋሊዲ ኢዛ ሃንቆዛን አሳይ ማሮቴላሲኔ ማቃይኖሰ ጋሊዳ ጊሻሰ ሄሲ ኢዛሰ ሲዬቲዳ ኡፋይሳ ቆንጨሴሰ። ቃሴካ ዩሁዳን ዲዛ አማኒዛ አሳ ማዳናሰ ኪያቴላ ማዶ አማና ማላ ኢሰታ ቆፍሴሰ፤ ወርሴላ ሼምፖታ ቦላ ጳውሎሲ ባ ሃዋሬቴላ ቦላ ዴንዲዳ ሞቶዛ ጊሻሰ ባና ማዲዛ ማካልካያ ዛሮ አሜሰ። ቆሮንቶሴ ዋሳ ኬላን ኢሲ ኢሲ አሳቲ ባርካ ባና ቱሙ ሃዋሬቴ ኦና ጉሳን ጳውሎሳ ዋርዶ ሃዋሬ ጊዲ ሞቴቴሰ።

ሃ ማጻፋይ ኦይኪዳ ኩሜላ ቆፋ

ጌሎሶ 1:1-11

ጳውሎሳኔ ቆሮንቶሴ ዋሳ ኬላ 1:12—7:16

ዩሁዳን ዲዛ አማኒዛ አሳ ማዳናሰ ሚሼ ኬሶ 8:1—9:15

ጳውሎሲ ባሰ ሃዋሬቴላ ጊሻሰ ሺሺዳ ማካልካያ ዛሮ 10:1—13:10

ኩሻ ቆፋ 13:11-14

¹ ጸሳ ሼኔ ማላ ዩሱሰ ኪርሰቶሳሰ ኪቴቲዳ ጳውሎሳፔኔ ኦ አሻ ጲምቶሳፔ ቆሮንቶሴን ዲዛ ጸሳ ዋሳ ኬሴይሰ ቃሴካ አካያ ቢታን አማኒዛ ኩሜላ አሳሰ።

2 ኑ አዋ ጸሳፌኔ ጎዳ ዬሱስ ከርሰቶሳፔ ኪያቴሌኔ ሳሮይ ኢንቴሰ ጊዶ።

ጳውሎሲ ጸሳሰ ሺሺዳ ጋላታ

3 ማሪዛ አዋሲኔ ወርሲካ ሚንፍሌዛ ኑ ጎዳ ዬሱስ ከርሰቶሳ አዋ ጸሳሰ ጋላታይ ጊዶ።

4 ኑኒካ ኑ ባጋራ ጸሳፌ ዴሚዳ ሚኖቴላን ሜቶቴዛይታ ሚንፍላናሰ ዳንዳያና ማላ ኑ ሜቶን ኢዚ ኑና ሚንፍሌሰ።

5 ከርሰቶሳ ዋዬይ ኑ ቦላ ዳሪዳይሳ ማላ ኑስካ ከርሰቶሳ ባጋራ ሚንፍላይ ዳሬሰ።

6 ኑ ሜቶን ኢንቴ አቶቴሌኔ ሚኖቴላ ዴሚታ፤ ኑኒ ሜቶቴሺን ቃሴ ኢንቴካ ካሴ ኤኪዳ ሜቶዛ ማላ ጌንጪ ኤኪዳ ሚኔታንዴታ።

7 ኑ ሜቶ ኢንቴ ኑናራ ሻኪ ኤኪዳ ማላ ኑናራካ ኢንቴ ሚኔታናይሳ ኑኒ ኤሪዛ ጊሻሰ ኑስ ኢንቴ ቦላ ዲዛ ኡፋይሲ ጊታ።

8 ታ ኢሻቶ! ኢሲያ ቢታን ኑ ቦላ ጋኪዳ ሜቶዛ ጊሻሰ ኢንቴ ኤራና ማላ ኑ ኮዮስ፤ ሄ ኑ ቦላ ጋኪዳ ሜቶዚ ኑ ቶካናፔ ዴጾ ጊዲዳ ጊሻሰ ሃይቆንታ ፓጻ ዴና ጊዲ ቆፒቤኮ።

9 አዳፊካ ኑ ቦላ ሃይቆ ፒርዳይ ፒርዴቲዳ ሚሳቲዴስ፤ ሄሲ ወሪካ ኑ ቦላ ጋኪዳ ጋሶይካ ኑኒ ሃይቁዳይታ ዴንፍሊዛ ጸሳን አማኔታናሳፌ አቴን ኑ ዋልቃን አማኔቶንታ ማላ ሃኒዴስ።

10 ኢዚ ኑና ሄሳ ማላ ቆፖንታ ሃይቆፔ አሺዴስ፤ ሃኒካ ዋዴፔካ ኢዚ ኑና አሻናይሳ ኑ አማኔቶሰ።

11 ኢንቴካ ኢንቴ ዋሳን ኑና ማዲቴ፤ ዳሮ አሳ ዋሳን ኑስ ኢሜቲዳ ኢሞታሲኔ ኑ ጊሻሰ ዳሮቲ ጸሳ ጋላቴቴሰ።

ጳውሎሲ ቤያና ባና ጊዳ ቆፋ ላሚዴስ

12 ሂስቲኮ ኑ ጨቁቴሌ ሃይሳ ማላ፤ ሃ አላሜዛን ሃራፔካ ኢንቴሳራ ኑሳራ ዲዛ ጋይቶቴላን ጸሳፌ ጊዲዳ ጌሻቴላኒኔ ሱሬቴላን ኑ ዴኢዳይሳ ኑ ዋዚናይ ኑስ ማርካቴሰ፤ ሄሲካ አሳ ጪንጫቴላን ጊዶንታ ጸሳ ኪያቴላና።

13 ኢንቴ ናባቢዲ ኤራናሰ ዳንዳዮንታ ሚሽ ኑ ኢንቴሰ ጸፎኮ፤ ኢንቴ ወርሲካ ናባቢዲ ኤራናይሳ ኑ ኤሮስ።

14 ኢንቴ ኑናን ጨቁቴዛይሳ ማላ ኑኒካ ኢንቴናን ጨቁቴዛይሳ ሃኒ ወርሲ ኤሮንታ አጊኮካ ጎዳ ዬሱሲ ሲሚ ዪዛ ጋላሰ ወርሲካ ኤራና።

15 ታኒ ሃይሳ ሻካ ኤሪዛ ጊሻሰ ናምኤቶ ኢንቴ ጎኤታና ማላ ኮይሮ ኢንቴና ቤያና ቆፓዲሰ።

16 ሄሲካ ታ ካሴ ማቂደኒያ ባሼ ኢንቴና ቤያዳ ማቂደኒያፔካ ሲማሼ ኢንቴ አቻራ አዳዳ ታ ዩሁዳ ቢሺን ኢንቴ ታና ማዳና ማላ ቆፓዲሰኮሺን።

17 ሃይሲ ታ ቆፋይ ኢንቴሰ ታ ሎኤላ ቆፖንታ ቆፋ ሚሳቲዜ? ዋይኮ አይዛቤታሰ ሎሴ ጊዲዳይሳሶ ታኒካ ኢሲቶ፡ «ኤሮ ኤሮ፡ ቃሴካ አካይ አካይ» ጊዛ ሚሳቲዜ?

18 ጸሲ አማኔቲዳ ጸሰ ጊዲዳ ማላ ኑ ኢንቴሰ ዮቲዛ ቃላይካ፡ «ኤ» ጊዲ «አካይ» ጊዛዝ ጊዴና።

19 ጋሶይካ ታና ጊዲን ዋይኮ ሲልዋኖሳኔ ጸምቶሳ ጊዲን ኑ ኢንቴሰ ሳባኪዳ ጸሳ ና ዬሱሰ ኪርሰቶሲ፡ «ኤኔ አካይ» ጊዴና፤ ጊዶ አቲን ኡባ ዋዴ ኢዛን፡ «ኤ» ጸላላይ ዴሰ።

20 ጸሳፌ አማኔቲዳ ሂደታቲ ዉሪካ፡ «ኤ» ጊዲዳይ ኢዛና፤ ኑኒካ ኢዛ ባጋራ ጸሳ ቦንቸሰ፡ «አሚን» ጊዛይ ሄሳ ጊሻሳ።

21 ሄሳ ጊሻሰ ኢንቴካ ኑኒካ ኪርሰቶሳን ሚኒ ኤቃና ማላኔ ባ ኦሶስ ዶሪዳይ ጸሳ።

22 ኑ ኢዛይታ ጊዲዳይሳ ኤሪሳናሰ ባ ማታሜ ኑ ቦላ ሾጪዳይኔ ኑኒ ሲንሳፌ ዴማና ሚሻሰ አያና ዋሴቴል ኑ ዋዚናን ዋሊዳይ ኢዛ።

23 ታኒ ቆሮንቶሴ ሲማዳ ኢንቴኮ ቦንታ አጊዳይ ኢንቴና ሚሺሲኬ ጋዳኮ፤ ቃሴ ሄሲ ቱሙ ጊዶንታ ዋርዶ ጊዲኮ ጸሲ ታ ቦላ ማርካቶ።

24 ኢንቴ አማኖን ኤቂዳ ጊሻሰ ኢንቴና ኡፋይሳናሰ ኑ ኢንቴናራ ኦላና አቲን ኢንቴ አማኖ ቦላ ጎዳታናሰ ጊዴና።

2

1 ታ ኢንቴና ሚሺሳናሰ ኮዮንታ ጊሻሰ ቃሴካ ኢንቴኮ ቢኬ ጋዳ ቆፋ ቃቻዲሰ።

2 ታ ኢንቴና ሚሺሲዳዝ ጊዲኮካ ሚሹቲዳ ኢንቴፌ አዲ ኡፋይሲዛይ ታሰ ሃራይ ኑኒ ዲዜ?

3 ታ ካሴ ኢንቴሰ ጸፊዳይ ታ ኢንቴኮ ቢዛ ዋዴ ታና ኡፋይሳናሰ ቤሲዛ አሳቲ ታና ሚሺሶፔቶ ጋዳ ጸፋዲሰ፤ ጋሶይካ ታ ኡፋዬቲኮ ኢንቴሰ ኡባሲካ ኡፋይሰ ጊዳናይሳ ታ አማናይሰ።

4 ታ ኢንቴሰ ሄሳሶ ጸፊሺን ታ ዋዚናን ዳሮ ሚሻይኔ ዳሮ ቆፋይ ኩሚ ዲሺን ዳሮ አፋንጻሼ ጸፋዲሰ፤ ሄሳካ ታ ኦሊዳይ ታ ኢንቴና

ዳሮ ሲቁዛይሳ አንቴ ኤራና ማላ ጋዳ አቲን አንቴና ሚሺሳናሰ ጊዳና።

ቆሂዳዴሰ አቶ ጉሰ

⁵ ኦኒካ አሴ ቆሂዳ ጊዲኮ ጉጃቾ ጊደንታ ማላ ቆሂዳዴይ ታና ጸላ ጊደንታ ጉሳራ ጊዲኮካ አንቴናካ ኡባ ቆሂዳሰ።

⁶ ሄሳ ማላ አሳሰ ዳሮ አሳይ ኢዛ ቦላ ዋሊዳ ቂጻቴይ ኢዛዴሰ ጊዳና።

⁷ ሄሳዴይ ኬሂ ሙዞቲዲ ሂዶታ ቃንጾንታ ማላ አንቴ ሄሳዴሰ አቶ ጊዲ ኢዛ ሚንጮላናሰ ቤሴሰ።

⁸ ሄሳሉካ አንቴ ኢዛ ሲቁዛይሳ ዛሬሊዲ ኢዛ ቤሳና ማላ ታ አንቴና ዋሳይሰ።

⁹ ታ ሃይሳ አንቴሰ ጸፊዳይ አንቴ አንቴና ጋኪዛ ፓጩ ጸኒዲ ኡባን አንቴ ኣዛዜቲዛኮ ኤራናሳ።

¹⁰ አንቴ አቶ ጊዛዴሰ ታኒካ አቶ ጋይሰ፤ ቃሴ ታ ቱማፔ አቶ ጋናዚ ዲዛ ጊዲኮ ኪርሰቶሳ ሲንላን ታ አቶ ጊዛይ አንቴ ጊሻሰ ጋዳኮ።

¹¹ ታ ሄሳሉ ኦሊዛይ ጸላኤይ ጌሊዛ ጸኤ ዴሞንታ ማላ ጋዳኮ! ኑኒ ኢዛ ጌኔ ቆፋ ባሎኮ።

¹² ታኒ ኪርሰቶሳ ሚሺራቾ ቃላ ዮታናሰ ጸርኣዳ ቢዳ ዋዴ ጎዳይ ታሰ ኦሶ ኦጌ ዶይዴሰ።

¹³ ጊደ አቲን ታኒ ታ ኢሻ ቲቶሳ ሄን ዴሞንታ ኣጊዳ ጊሻሰ፤ ታ ዋዚናይ ሽምፖንታ ኢጲዳ ጊሻሰ ኢሰቲ ታና ሄፔ ሞይዚን ማቂደኒያ ዴሬ ባዲሰ።

¹⁴ ጊደ አቲን ኪርሰቶሳ ባጋራ ኡባ ዋዴ ኑና ጸኖ ኦጌን ካሌሊ ዩሺዛኔ ባ ሎኮ ኤራቴላ ኑ ባጋራ ኡባሶን ቆንጨሲዛ ጎዳሰ ጋላታይ ጋኮ።

¹⁵ ጋሶይካ ኑኒ ጳያናይታሲኔ ኣታናይታሰ ጊደን ኪርሰቶሳ ባጋራ ጸሳሰ ሽቂዳ ሳዋ ቱኑ ጊዛ ኤጸኔ ማላ።

¹⁶ ጳያናይታሰ ኑኒ ዋዲዛ ጸንቆ፤ ኣታናይታሰ ቃሴ ሃይቆፔ ዴኦሶ ኤፊዛ ዴኦ ሳዋ፤ ሂሰቲን ሃይሳሰ ቤሲዛዴይ ኦኔ?

¹⁷ ኑኒ ዋዴ ዴማናሰ ጊዲ ጸሳ ቃላ ሻቃጩ ማላ ዋላኬሬሊዲ ባይዚዛ ዳሮ ኣሳታ ማላ ጊደኮ፤ ጊደ አቲን ጸሳፊ ከቴቲዳ ሱሬ ኣሳ ማላ ጊዲዲ ኪርሰቶሳን ጸሳ ሲንላን ሱሬ ዮቶሰ።

3

ኦራላ ጫቆ ኦሳንቻታ

1 ኮኒ ሃኢ ኑርካ ኑና ዛሪዲ ጋላቲኖ? ዋይኮ ሃራ ኣሳታ ማላ ኢንቴሰ ጊዲን ዋይኮ ኢንቴፌ ሃ ኑስ ጸፊቲዳ ጋላታ ዳብዳቤ ኮሺዜሻ?

2 ኢንቴ ቃሴ ኣሲ ዉሪ ኤሪዛይኔ ናባቤቲዛ ኑ ዋዚና ጋርሳን ጸፊቲዳ ዳብዳቤታ።

3 ኢንቴ ቃላሚን ጸፊቲዳይታ ጊደንታ ዴኦ ጸሳ ኣያናን ጸፊቲዳይታ፤ ቃሴካ ሹቻ ቦላ ዋጮቲ ጸፊቲዳይታ ጊደንታ ኣሳ ዋዚናን ጸፊቲዳይታኔ ኢንቴ ኑናን ጎኤቲዳ ኪርሰቶሳስ ቆንጮ ዳብዳቤታ።

4 ኪርሰቶሳ ባጋራ ኑስ ጸሳ ቦላ ዲዛ ኣማኖይ ሄሳ ሚሳቴሰ።

5 ኑና ሄሳስ ጋሊዳይ ጸሳፌ ኣቲን ኮኒ ኑ ዋልቃን ኦሊዶስ ጊዛ ሚሺ ኢሶይካ ዴና።

6 ሄሲካ ፒዳሌን ጸፊቲዳ ዋጋን ጊደንታ ኣያናን ጸፊዳ ኦራላ ጫቆ ቃላ ኦሳንቻታ ኑ ጊዳና ማላ ኦሊዶስ፤ ጋሶይካ ፒዳሌን ጸፊቲዳ ዋጋይ ዋጴስ፤ ኣያናይ ጊዲኮ ዴኦ ኢሜስ።

7 ሄሳ ጊሻስ ኢሰራኤሌ ናይቲ ኢዛ ኣይፌሶን ዲዛ ቦንቾ ጋሶቴላን ሙሴ ኣይፌሶ ቲሺ ሂስቲ ጴሎይ ኢስታ ጸናና ጋካናስ ሄሲ ጉዬፔ ጳያናይሲኔ ሹቻ ቦላ ዋጮቲ ጸፊቲዳ ሃይቆ ጊዲዳይሲ ቦንቾን ቆንጪዛይሳ ጊዲኮ።

8 ሂስቲን ኣያና ኦሶስ ዋኒዲ ሄሳፌ ኣጲዛ ቦንቾይ ዴኔ?

9 ኣሲ ኢዛን ፒርዴቲዛ ኦሶይ ሄሳ ማላ ቦንቹቲዛይሳ ጊዲኮ ኣሲ ኢዛን ጸሊዛ ኦሶይ ሄሳፌ ኬሂ ኣጲዛ ቦንቾይ ኢዛስ ዋኒ ዴኔ?

10 ሃይሳፌ ካሴ ቦንቹቲዳይሲ ሃራ ኢዛፔ ኣጲዛ ቦንቾይ ዲዛይሳራ ግሰሲሺን ቦንቾይ ባይንዳይሳ ጊዲዴስ።

11 ጴሚ ጴሚ ቢዛይሳስ ሄሳ ማላ ቦንቾይ ዲኮ ሜርናስ ሚኒ ኤቂ ዳናይሳስ ሄሳፌ ኬሂ ኣጲዛ ቦንቾይ ዋኒ ዴኔ?

12 ሄሳ ጊሻስ ሄሳ ማላ ሂዶታይ ኑስ ዲዛ ጊሻስ ኮኒ ጸላቴላን ሃሳኖስ።

13 ኢሰራኤሌ ናይቲ ሙሴ ኣይፌሶይ ጸልቂዛይሳ ኣጊ ኣጊ ቢሺን ኢስቲ ዉርሴላ ቤኦንታ ማላ ኢዚ ባ ኣይፌሶ ጎዚዳ ሙሴ ማላ ጊደኮ።

14 ጊደ ኣቲን ካሴ ጋልኣ ጫቆ ቃላይ ናባቤቲሺን ሄ ዎዴ ጎሳዚ ሃቶ ጋካናሰ ኪቐንታ ገሻሰ ኢሰታ ዎዚናይ ዶጪዳ ማላ ዴሰ፤ ሄ ጎሳይ ሃኢካ ኪቐቤና፤ ኢዚካ ኪቐናይ ኪርሰቶሳን ጸላ።

15 ሃቶ ጋካናሰካ ሙሴ ማጸፋቲ ናባቤቲዛ ዎዴ ሄ ዎዴ ጎሳይ ሃኢካ ኢሰታ ዎዚና ጎዚ ኦይኬሰ።

16 ጊደ ኣቲን ኢሳዴይ ጎዳኮ ሲሚዛ ዎዴ ጎሳዚ ቃሬቲ ኪቐሰ።

17 ጎዳይ ኣያና። ጎዳ ኣያናይ ዲዛሶን ኣይሌቲሌ ዴና።

18 ኑኒካ ጎዳ ቦንቐ ማሰቶቲ ማላ ጸልቄቲሼ ኢዛ ሚሳታናሰ ሃ ቦንቐፌ ሃራ ቦንቐን ላሚታና፤ ሄሲካ ኣያና ጊዲዳ ጎዳ።

4

ቱሙ ሃዋራቲሳ ኦሶ

1 ጸሳ ማርቲሳ ዳርፔ ዴንዲዳይሳን ሃይሲ ሃ ኦሶዚ ኑሰ ዲዛ ገሻሰ ኑኒ ሂዶታ ቃንጸኮ።

2 ጊደ ኣቲን ጌማራ ሃኒዛ ዩላሲዛ ዮኦታ ኑ ኣጊደሰ፤ ኣሰ ባሌሶኮ፤ ጸሳ ቃላ ዎርዶራ ዋላኮኮ፤ ሄሳ ሂሰታናፔ ቱሙ ዮኦታ ቆንጨራ ዮቲሼ ኣሲ ዉሪካ ኑ ጊዛይሳ ኤካና ማላ ኑናቲሳ ጸሳ ሲንሕ ሺሾሰ።

3 ኑ ሚሺራቕ ቃላይ ጎርዴቲኮካ ኢዚ ጎርዴቲዳይ ቆያናይታሳ።

4 ጸሳ ለሚሶ ጊዲዳ ኪርሰቶሳ ቦንቐ ሚሺራቕ ቃላ ፖኦዛ ሃ ኣላሚ ኣሳይ ቤኣንታ ማላ ሃይሳ ሃ ኣላሚ ጸሲ ኣማኖንታ ኣሳ ዎዚና ሙሚሲዴሰ።

5 ኑኒ ዬሱሰ ኪርሰቶሲ ጎዳ ጊዲዳይሳ ሳባኮሰ ኣቲን ኑና ሳባኮኮ፤ ኑኒካ ኑ ባጋራ ዬሱሳ ገሻሰ ኢንቴሰ ኦሌዛዴንታ ጊዲደሰ።

6 ኪርሰቶሳ ሲንሳን ጸሲ ባ ቦንቐ ኤራቲሳ ፖኦ ኑሰ ኢማናሰ፤ «ፖኦይ ቋማን ፖኦ» ጊዳ ጸሲ ባ ፖኦ ኑ ዎዚናን ፖኢሲዴሰ።

7 ጊደ ኣቲን ሃይሲ ጌታ ዎልቃይ ኑሰ ጸሳፌ ኢሜቲዴሰ ኣቲን ኑፔ ጊደንታይሳ ቤሳና ማላ ሃይሲ ቦንቐ ሚሻይ ኑናን ኦቶ ሚሳቲዛይታ ጊደን ዴሰ።

8 ኣዋ ባጋራካ ኑና ሱጊኮካ ኑኒ ቲንሕ ጊ ሜቆኮ፤ ኑሰ ዮኦይ ቲፒ ጊኮካ ሂዶታ ቃንጸኮ።

9 ኑ ጎዴቲኮካ ዎራ ዎጲ ኣቶኮ፤ ኢሰቲ ኑና ሾጪ ጌንዴሪሲኮካ ኑ ቆዮኮ።

10 ዬሱሳ ዴኦይ ኑ አሳቴላን ቆንጫና ማላ ኑኒ ኢዛ ሃይቆ ኡባ ዎዴ ቶኪ ዩዮስ።

11 ዬሱሳ ዴኦይ ሃይቂዛ ኑ አሳቴላን ቆንጫና ማላ ፓጸ ዲዛ ኑኒ ኡባ ዎዴካ ዬሱሳ ጊሻሰ ሃይቆስ ኣጂ ኢሜቶስ።

12 ሄሳ ጊሻሰ ኑ ሃይቆስ ኣጂ ኢሜቲሺን ኢንቴ ቃሴ ዴኦን ጋኬታ።

13 ካሴ ጌሻ ማጸፋን ጸፌቲዳ ማላ፥ «ታ ኣማኒዳ ጊሻሰ ሃሳያዲስ» ጌቲቲዳይሳ ኑኒካ ሄሳ ሄ ኣማኖ ኣያናን ኣማኒዛ ጊሻሰ ሃሳዮስ።

14 ጋሶይካ ጎዳ ዬሱስ ከርሰቶሳ ሃይቆፔ ዴንሉዳይሲ ኑናካ ኢዛራ ኢሲፌ ዴንሉዲ ኢንቴናራ ባ ሲንሉ ሸሻናይሳ ኑ ኤርሰ።

15 ዳሮ ኣሳ ጋኪሼ ዲዛ ኪያቴሉ ጸሳ ቦንቾሰ ጋላታ ቦላ ጋላታ ጉጃና ማላ ሃይሲ ወሪካ ኢንቴና ጎኣናስ ሃኒዴስ።

16 ሄሳ ጊሻሰ ኑ ሂዶታ ቃንጾኮ፤ ኑስ ካሬ ባጋ ኣሳቴላይ ቆዩ ቆዩ ቢኮካ ኑስ ጋላ ባጋ ኣሳቴላይ ጋላስ ጋላስ ኑራጺ ኑራጺ ቤስ።

17 ሄሳስ ሃኢ ጉላ ዎዴስ ኑና ጋኪዛ ዋዬይ ኢዛራ ጊጋናስ ዳንዳዮንታ ሜርናስ ጊዲዛ ቦንቾን ኑና ጋላና።

18 ሄሳ ጊሻሰ ኑ ቲሺ ሂሰቲ ዶሊዛይ ሃኢ ኣይፊን ቤቲዛ ሚሻ ቦላ ጊዶንታ ሃኢ ኣይፊን ቤቶንታ ሚሻ ቦላ ዴስ፤ ሃኢ ቤቲዛይሲ ኢዚ ሃኢስ ጸሳ፤ ሃኢ ኣይፊን ቤቶንታይሲ ጊዲኮ ኢዚ ሜርናሳ።

5

ሜርናስ ዳናሶ

1 ኑኒ ኢዛን ቢታ ቦላ ዲዛ ዳንካኔይ ላሌቲኮካ ኣሳ ኩሼን ጊዶንታ ጸሳ ኩሼን ኑሴቲዳ ሜርና ኬሉ ኑስ ሳሎን ዲዛይሳ ኑ ኤርሰ።

2 ሄ ዎዴይ ጋካናስ ኑ ኬላ ሳሎይሳ ማይኣናስ ኑ ላሞቲ ናጎስ።

3 ቱማፔ ሄሳ ኑ ማይኢዳፔ ጉዬ ካሎቶኮ።

4 ኑኒ ሃይሳ ሃ ዳንካኔዛን ዲዛ ዎዴ ኡባን ኢዚ ዴጺዛ ጊሻሰ ዳቡራ ፒጂ ጎስ፤ ሄሳስ ጋሶይካ ሃይቂዛይሲ ዴኦን ላሜታና ማላ ኑኒ ሳሎን ዳና ሶሆዛ ማይኣና ኣቲን ኑፔ ቃሬታና ማላ ኑ ኮዮኮ።

5 ሄሳስ ኑና ጊግሲዳይ ጸሳ፤ ቡሮ ያናይሳስ ዋሴ ጊዳና ማላ ኑስ ባ ኣያና ኢሚዳይ ኢዛ።

6 ኑኒ አሾን ዲዛ ዋዴ ጎዳፔ ሃኪ ዲዛይሳ ኤሪኮካ ኢዛን አማኔቲዲ ደሰ።

7 ኑኒ ዲዛ ዲሳይ ጎዳን አማኒዲ አቲን አይፌን ቤኦን ጊዴና።

8 ኑኒ አሾፔ ሻኬቲዲ ጎዳራ ዲሰ ዶራናይሳ ታ ሲታንታ ዮታይሰ።

9 ሄሳ ጊሻሰ ኑኒ አሾን ዲኮ ዋይኮ አሾፔ ሻኬቲኮካ ኑሰ ዋና ቆፋይ ጎዳ ኡፋይሰ።

10 ኑኒ ወሪካ ኪርሰቶሳ ፒርዳ ዋምቦራ ሲንሐ ሺቃናይሲ አቲና፤ ኑፔ ኢሶይ ኢሶይ ቢታ ቦላ ባ ኦሊዳይ ኢታ ጊዲን ዋይኮ ሎኦ ጊዲን ባ ኦሶ ማላ ቤሲዛ ዋጋ ባሰ ኤካና።

ጸሓፊ አስ ማቃዩንሉ

11 ሄሳ ጊሻሰ ጎዳሰ ያሻ ጉሲ አይ ጉሳኮኔ ኑ ኤሪዛ ጊሻሰ አሳይ ኑ ዮቲዛይሳ ኤሮ ጊ ኤካና ማላ ኦላናሰ ዳቡርሰ፤ ኑኒ ኦናንታኮ ጸሳ አቻን ቆንጮ፤ ቃሴካ ኢንቴ ዋዚናንካ ቆንጮ ጊዲዳይሳ ታ አማናይሰ።

12 ታ ሄሳ ጊዛይ ኑና ኢንቴ ሲንላን ጋላታናሰ ጊዴንታ ዲሺን ኢንቴ ኑናን ጮቄታና ማላ አቲን ዋዚናፔ ጊዴንታ አይፌን ቤቲዛ ሚሻን ጮቄቲዛይታሰ ኢንቴ ዛሮ ኢማናሰ ዳንዳያና ማላ ጋዳ ጋይሰ።

13 ኑ ጎሽ ጊዲኮ ጸሳ ጊሻሰ ጊዲ ጎዴደሰ፤ ኤራታ ጊዲኮካ ኢንቴሰ ጊዲኮ!

14 ኪርሰቶሲ ኡባሰ ኢሲቶ ሃይቆይሳኔ ሃራይ ወሪካ ኢዛራ ኢሲፌ ሃይቂዳይሳ ኑ ኤሪዳ ጊሻሰ ኪርሰቶሳ ሲቆይ ኑና ዋልቃራ ኦሲሴሰ።

15 ሺምፖራ ፓጸ ዲዛይቲ ወሪካ ሄ ሃይቂዳይሳሲኔ ሃይቆፔ ዴንዲዳይሳሰ ዳና ማላፔ አቲን ሃይሳፌ ጉዬ ኢሰቲ ባሰ ዶንታ ማላ ኪርሰቶሲ ኡባሰ ሃይቂዳሰ።

16 ሄሳ ጊሻሰ ሃይሳፌ ጉዬ ኑኒ አይ ኣሲካ አሾ አይፌን ጴሎኮ፤ ኑኒ ሃይሳፌ ካሴ ኪርሰቶሳ አሾ አይፌን ጴሊዳ ጊዲኮካ ሃይሳፌ ጉዬ ሄሳሶ ጴሎኮ።

17 ሄሳ ጊሻሰ ኦኒካ ኪርሰቶሳ ባጋ ጊዲኮ ኢዚ ኦራላ ሜዴቴላ፤ ካሴ ጮጋ ሜዴቴላ ኣፂዴሰ፤ ኢዚ ኪቸሳን ሃራ ኦራላ ሜዴቴላ ጌሊዴሰ።

18 ሄሲ ወሪ ሃኒዳይ ኢዚ ኑና ባናራ ኪርሰቶሳ ባጋራ ማቃዩንሲዲኔ ማቃዩንሉ ኦሶ ኑሰ ኢሚዳ ጸሳና።

19 ሄሲካ ጸሲ ከርሰቶሳ ባጋራ ሃንኮ አላሜ አሳ ወርሲካ ባናራ ማቃዪን፡፡፳፩ ያሳ፤ ኢሰታ ቆሆዛካ ቆዲቤና፤ ኑኒ አሰ ጎዳራ ማቃዪን፡፡፳፩ ቃላ ኑሰካ ኢሚደሰ።

20 ጸሲ ኑ ባጋራ አሰ ጸይጊዛ ጊሻሰ ኑኒ ቃሴ ከርሰቶሳ ኦጋታ፤ ሄሳ ጊሻሰ፡ «ኢንቴ ጸሳራ ማቃይኒቴ!» ጊዲ ኑ ኢንቴና ከርሰቶሳ ሱንፋን ዋሶሰ።

21 ኑኒ ከርሰቶሳ ባጋራ ጸሳ ጸሎቴል ጊሼቲ ኤኪዛይታ ጊዳና ማላ ጸሲ ኢዛ ቦላ ናጋራይ ባይንዳ ከርሰቶሳ ኢዚ ኑ ናጋራ ቶካና ማላ ኦሊደሰ።

6

1 ኑኒ ጸሳራ ኦሊዛይታ ጊዲዳ ማላ ኢንቴ ኤኪዳ ጸሳ ኪያቴላ ጮ ማላ አሸፍቲ ጊሼ ኑ ኢንቴና ዋሶሰ።

2 ጸሲ፡ «ታኒ ታሰ ጊጊዳ ጋላሰ ኔና ሲያዲሰ! አቲዛ ጋላሰ ታ ኔና ማዳዲሰ!» ጊዛ ጊሻሰ ሎኦ ዋዴይ ሄኮ ሃኢ! አቴላ ጋላሲካ ሃኢኮ!

3 ኑ ኦሶይ ለቄቶንታ ማላ አይ ዋዴካ ኦናሰካ ኑኒ ቋጼ ጊዶኮ።

4 ሄሳፊ አሊዲ ዋዴኔ ሜቶ ኡንኦካ ዳንዳያን፤ ጸሳሰ ኦሊዛ አሳታ ማላ አይ ኦጌራካ ኑናቴላ አሊ ኢሞሰ።

5 ኑኒ ጸሳሰ ኦሊዛይታ ጊዲዳይሳ ቤሲዛይ ጋራፊቴላን፡ ቃሽቴላን፡ ሂርጋን፡ ዳቡሪ ኦሶን፡ ጳሰኮ ጳዮኒኔ ጋፋና።

6 ሄሳሶካ ጌሻቴላን፡ ኤራቴላን፡ ዳንዳያን፡ ኪያቴላን፡ ጸሎ አያና ካሎኒኔ ቆጼፔ ቆሞን ጊዶንታ ሲቆን፡

7 ቱማ ቃላኒኔ ጸሳ ዋልቃና፤ ኑ ኢዛን ጌዴ ኦሊ ጸኒዛ ኦላ ሚሺኔ ካሜቲ አቲዛ ጎንዳሌይ ጸሎቴላ።

8 ቦንቾሰ ጊዲን ዋይኮ ካወሻሰ፡ ቆጵታናሰ ዋይኮ ጋላታናሰ ኑኒ ጊጌቲዳይታ፤ ኑኒ ቱማንቻታ ሺን አሴ ባሌሊዛይታ ጌቲቲዶሰ።

9 ኑኒ ኤሬቲዳይታ ሺን ኤሬቶንታይታ ጊዲዶሰ፤ ኢሰቲ ሃይቂዳይታኮ ጊሺን ኑኒ ፓጻ ዶሰ፤ አሳይ ኑና ቡኪ ቡኪንካ ኑ ሃይቂቤኮ።

10 ሙዛይ ኑና ጋኪኮካ ኡባ ዋዴ ኡፋዬቶሰ፤ ኑኒ ማንቆኮ ሺን ዳሮ ማንቆታ ዱሬ ኬሶሰ፤ ኑሰ አይኮይካ ባይንዳይታ ሺን ዉሪካ ኑሰ ዴሰ።

11 ኢንቴኖ ቆሮንቶሴን ዲዛይቶ! ታ ካሴ ኢንቴሰ ቆንጨን ዮታዲሰ፤ ኑኒ ኑ ዋዚና ኢንቴና ኡባ ቤሲዶሰ።

12 እንቴ ቃሴ ኑና እንቴ ሲቆ ቤሳናሰ ኡዜቲዳታ ኣቲን ኑ እንቴና ኑ ሲቆ ቤሳናሰ ኡዜቲቤኩ።

13 ኣዋይ ባ ናሰ ዮቲዛ ማላ ታኒካ እንቴሰ ኣኔ ዮታይሰ፤ ኑኒ ኑ ዋዚና ከሂ ደይዲ ኑ ቆፋ እንቴሰ ቆንጨሶይሳሶ እንቴካ ኑሰ ሄሳሶ ቆንጨሲቲ።

አማኖንታይታራ ዙፔቴሰ አጎ

14 አማኖንታ አሳራ ጊጋይ ባይንዳ ኢሲፌቲላን ኦይኬቶፍቲ፤ ጸሎቴሴኔ ናጋራይ ዋኒ ኢሲፌታናሰ ዳንዳይዜ? ፖኑይኔ ቋማይ ኢሲፌ ዋኒ ዳና ዳንዳይዜ?

15 ኪርሰቶሲኔ ዳቡሎሲ * ዋኒ ጋጋናሰ ዳንዳይዜ? አማኒዛዳይ አማኖንታዳራ ኣዛን ላጌታናሰ ዳንዳይዜ?

16 ጸሳ ዋሳ ኬላሰ ኤቃታራ ኣዛ ጋጎይ ዲዜ? ጸሲካ፡

«ታኒ ታ ዱሳሶ

ታ ዴሬዛ ጊዶን ኦላና፤

ታኒካ ኢሰታራ ዳና፤

ኢሰታሰካ ጎዳ ጊዳና፤

ኢሰቲካ ታ ዴሬታ ጊዳና» ጊዲ

ካሴ ዮቲዳ ማላ

ኑኒ ኢሶይ ኢሶይ

ዴኦ ጸሳ ኬላታ።

17 ጎዳይ፡ «እንቴ ኢሰታ ጊዶፌ

ሻኬቲዲ ኬዚቲ!

ቱና ሚሽ ቦቾፍቲ፤

ታኒካ እንቴና ኤካና።

18 ታ እንቴሰ ኣዋ ጊዳና፤

እንቴካ ታሰ ኣቱማ ናይታኔ

ማጫ ናይታ ጊዳንዳታ»

ጌሰ ኡባ ዳንዳይዛ ጎዳይ።

* 6:15 ዳቡሎሲ፡ ዳቡሎሲ ጊሪኬ ቃላራ፡ «ቤልያል» ዋይኮ «ቤልያር» ጌቲቲሰ፤ ኢብሪዊታ ቃላራ፡ «ቤልኦል» ጌቲቲሰ። ቢርሼላይ ጎኣይ ባይንዳይሳ [ኣይፌይ ባይንዳይሳ] ዋይኮ ዋጋይ ባይንዳይሳ ጉሳ። 6:16 1ቆሮ 3:16፤ 6:19 6:17 ኢሳ 52:11 6:18 2ሳሜ 7:14፤ 1ታሪ 17:13፤ ኢሳ 43:6፤ ኤር 31:9

7

1 ሄሳ ገሻሰ ታ ሲቆቶ! ሃይሲ ሂደታይ ኑሰ አሜቲዳ ገሻሰ አሾኔ አያና ቱኒሲዛ አይ ሚሻፊካ እኔ ኑና ጌሾሰ፤ ጸሳሰ ያሻን ኑ ጌሻቴላ እኔ ኩሚሳ ሂሰቶሰ።

ጳውሎሳ ኡፋይሰ

2 ኢንቴ ኑና ኡፋይሳን ሞኪ ኤኪቴ፤ ኑኒ ኦናካ ቆሂቤኮ፤ ኦናካ ቆሂቤኮ፤ ኦና ጎኣካ ኑሰ ባሌሊ ኤኪቤኮ።

3 ታኒ ሄሳሉ ገዛይ ኢንቴ ቦላ ፒርዳናሰ ጌዳና፤ ሃይሳፊ ካሴ ታ ኢንቴሰ ዮቲዳ ማላ ኢንቴ ኑ ዋዚናን ዴታ፤ ሄሳ ገሻሰ ሃይቆንካ ጌዲን ፓጸንካ ኡባ ዋዴ ኑ ኢንቴፊ ሻኬቶኮ።

4 ታሰ ኢንቴ ቦላ ዲዛ አማኖይኔ ጨቄቴሊ ዳሮ ጌታ፤ ታ ኢንቴናን ሚኔታይሰ፤ ኑና ጋኪዛ ሜቶ ኡባን ታኒ ኬሃ ኡፋይታይሰ።

5 ኑኒ ማቂደኒያ ጋኪዳ ዋዴካ ዲማ ዲማ ባጋራ ሜቶይ ኑና ጋኪዴሰ ኣቲን ኑኒ ኣይኮካ ሺምፖ ዴሚቤኮ፤ ኑሰ ሶራ ሂርጋይ፤ ካሬራ ቃሴ ኦሺ ዴሰ።

6 ጌዶ ኣቲን ሙዞቲዳይታ ሚንጼሊዛ ጎዳይ ቲቶሳ ዩሳን ኑና ሚንጼሊዴሰ።

7 ኑኒ ሚኔቲዳይ ኢዛ ዩሳን ጸላ ጌዶንታ ዲሺን ኢንቴ ኢዛ ሚንጼሊዳይሳ ኑ ጉጂ ሲዪዳ ገሻሳ፤ ኢንቴ ታና ላሞቲዳይሳ ታሰ ቃጴቲዛይሳ ቆፒዛይሳካ ኢዚ ኑሰ ዮቲን ሲያዳ ታኒ ዳሮ ኡፋይታይሰ።

8 ታኒ ሃይሳፊ ካሴ ኢንቴሰ ጸፊዳ ኪታይ ኢንቴና ሚሺሲዳ ጌዲኮካ ሄ ኪታ ጸፊዳ ገሻሰ ታኒ ሄሳሉ ኣዛሰ ጸፋዲና ጋዳ ሞጴቲኬ፤ ሞጴቲኮካ ታ ሞጴታናይ ጉላ ዋዴሰ ኢንቴ ታና ሚሺሲዳ ገሻሳ።

9 ሃኢ ጌዲኮ ታ ኡፋይታይሰ፤ ታኒ ኡፋይቲዳ ጋሶይካ ታኒ ኢንቴና ሚሺሲዳ ገሻሰ ጌዶንታ ኢንቴ ሄ ሚሻፒ ዴንዲዳይሳን ማርቴላን ጌሊዲ ላሜቲዳ ገሻሳ፤ ሄሳ ገሻሰ ኢንቴ ሚሺቲኮካ ጸሳ ሺኔ ማላ ጌዲዳ ገሻሰ ኑኒ ኢንቴና ኣይኮካ ቆሂቤኮ ጉሳ።

10 ጸሳ ሺኔ ማላ ጌዲዳ ሙዞቴሊ ጌዴ ማሬቲ ኣታናሶ ጋጼሰ፤ ሄሳሰካ ሞጴቴሊ ዴና፤ ዋዚናፔ ጌዶንታ ሙዞቴሊ ጌዲኮ ሃይቆን ጋጼሰ።

11 ሃይሲ ኢንቴ ሙዞቴሊ ጸሳ ሺኔ ማላ ጌዲዳ ገሻሰ ሄሲ ኣይ ማላ ሚኖቴላን፤ ኣይ ማላ ኦይሻ ዛሮን፤ ኣይ ማላ ኤሌ ሃንቄቴላን፤ ኣይ ማላ ያሻቴላን፤ ኣይ ማላ ላሞቴላን፤ ኣይ ማላ

ሎኦ አሞን፥ አይ ማላ ሙራን አንቴና ጋሊዳኮ አኔ አንቴ ዋዚናን ዩሺ ቆፒቴ፤ አንቴ ቃሴ ሃኒዳ ኡባንካ ሄ ሃኖዛፔ ጌሽ ጊዲዳይሳ ማርካሲዴታ።

12 ሄሳ ጊሻሰ ታ አንቴሰ ጳፊዳይሲ አንቴ ኑሰ አይ ማላ አማኔቲዛይታኮ አንቴ አንቴና ጸሳ ሲንፋን ቤያና ማላፔ አቲን ቆሃዳዴ ጊሻሲኔ ቆሃቲዳዴ ጊሻሰ ጋዳ ጊዴና።

13 ኑኒ ሚኔቲዳይሳፊ ቦላራ ቲቶሲ ደሚዳ ኡፋይሳን ዳሮ ኡፋዬቲዶስ፤ ኑኒ ኡፋዬቲዳይካ አንቴ ወሪካ ቲቶሳ ሚንፌሊዳ ጊሻሲኔ ኢዛ ዋዚና ሾምፒሲዳ ጊሻሳ።

14 ታኒ አንቴናን ጨቄቲዛይሳ ካሴ ቲቶሳሰ ዮታ ዋላዲሰ፤ አንቴካ ታና ዩላሲቤኬታ፤ ኡባ ዋዴ ታ አንቴሰ ቱማ ጸላላ ዮታሼ ዳይሰ፤ ሄሲካ ኑኒ አንቴ ጊሻሰ ቲቶሳሰ ዮቲዳ ዮኑይ ቱሙ ጊዲ አማኔቲዴስ።

15 አንቴ ወሪካ አዛዜቲዛይታ ጊዲዳይሳ፥ ያሻቴላኒኔ ኮኮሪሼ አንቴ ኢዛ ሞኪ ኤኪዳይሳ ቲቶሲ ቆፒ ኤኪዲ ኢዚ አንቴና ሲቁዛይሳሰ ዛዋይ ባ።

16 ታኒካ ኡባ ባጋራ አንቴናን አማኔታናሰ ዳንዳይዳ ጊሻሰ ዳሮ ኡፋዬታዲሰ።

8

ማዶ ኢሞ

1 ታ አሻቶ! ጸሲ ማቂዶኒያን ዲዛ አማኒዛ አሳሰ አሚዳ ኪያቴላ አንቴ ኤራና ማላ ታ ኮያይሰ።

2 ኢሰቲ ዳሮ ሜቶቲ ዲሼ ዳሮ ኡፋዬቲዳ፤ ኬሂ ማንቆታ ጊዲኮካ ዳሮ ኪያቴዳ።

3 ኢሰቲ ባሰ ዳንዳዬቲዛይሳ ማላኔ ባሰ ዳንዳዬቲዛይሳፊካ አሊ አሚዳይሳ ታ ኢሰታ ጊሻሰ ማርካታይሰ።

4 ዩሁዳን ዲዛ አማኒዛይታሰ ማዶ አማናሰ ዲጌቶንታ ማላ ኑና ኬሂ ዋሲዳ።

5 ኢሰቲ ኑኒ ቆፒዳይሳፊ ቦላራ አሊ ኦሊዳ፤ ኢሰቲ ኮይሮ ባና ጎዳሰ አሚዳ፤ ዛሪዲካ ጸሳ ሼኔ ማላ ባናካ ኑሰ አሚዳ።

6 ሃይሳ ኦሶዛ ኮይሮ ቲቶሲ ደሚዳ ጊሻሰ ሃኢካ ሃይሳ ማዶ አሞዛ ኢዚ ፖላና ማላ ኑ ኢዛ ዋሲዶስ።

7 አንቴ አማኖን፥ ሃሳያን፥ ኤራቴላን፥ ሚኖ ኦሶን፥ አንቴ ኑና ሲቁዛ ሲቆን፥ ኡባ ዮኦን አጼታ፤ ሄሳላካ ኪያቴላ ኦሶንካ አጲዛይታ ጊዲቴ።

8 ታ ሄሳ ጊዛይ አንቴና ጮ ማላ አዛዛናሰ ጊዴና፤ ጊዶ አቲን ሃንኮ ሃራ አሳይ ማኒ አሚዛይሳ አንቴናራ ጋላ ቤዪሺን አንቴ ሲቆይ ቱሙ ጊዲዳይሳ ሻካ ኤራናሳ።

9 አንቴ ኑ ጎዳ ዬሱስ ኪርሰቶሳ ኪያቴል ኤሬታ።

10 ሃይሳ ሃ ሃኖዛን ታሰ ሎኦ ጊዲ ቤቲዳ ዘሬ ታ አንቴሰ አማይሰ፤ ዘላይል አንቴ አሞ ጸላ ጊዶንታ ዲሺን አማናሰ ኮይሮፕ ቆፒዳይ አንቴና።

11 ሄሳ ጊሻሰ አንቴ አማናሰ ኮዪዳይሲ ፖሌታና ማላ አንቴሰ ዲዛ ማላ ካሴ አንቴ ቆፒዳይሳ ሃኢ ኦሊቴ።

12 አሲ አማናሰ ዋዚናፕ ኮይኮ ኢዛዴይ ኪያቴላን አሚዛይሲ ኤኬቲዛይ አሲ ባሰ ዲዛሪ ማላ አሚኮ አቲን ባሰ ባይንዳይሳፊ አሚሺን ጊዴና።

13 ታ ሃይሳል ጊዛይ አንቴ ዉሪካ ገና ጊዴና ማላ አቲን አንቴ አሞን ዋዬቲሺን ሃራቲ ሺምፓና ማላ ጋዳ ጊዴና።

14 አንቴ ዋዬቲሺን ኢሰታ ሚሻይ አንቴ ሜቶ አሻና ማላ ሃኢ ቃሴ አንቴ ሚሻይ ኢሰታ ሜቶ አሾ፤ ሄሳ ማላን አንቴ ጊዶን ገናቴሊ ዳና።

15 ሄሲካ፡ «ዳሮ ሺሺዳዴሰ ዋዲቤና፤ ጉል ሺሺዳዴሰካ ፓፌቤና» ጌቲቲ ጌሻ ማጸፋን ጸፊቲዳ ማላ።

ቲቶሳኔ ኢዛ ላጌታ

16 ታኒ አንቴሰ ቆፒዛይሳ ማላ ቲቶሳይካ አንቴሰ ዋዚናፕ ቆፓና ማላ ኦሊዳ ጎዳይ ጋላቴቶ።

17 ቲቶሲ አንቴኮ ቢዛይ ባርካ ባ ቆፋን ኡፋይሳንፕ አቲን ኑኒ ኢዛ ዋሲዳ ጊሻሰ ጸላ ጊዴና።

18 ሚሺራቾ ቃላ ኦሶን ዋሳ ኬላታን ኡባን ዶሴቲዳ አሻዛ ኑ ኢዛራ ጋሊ ዬዶስ።

19 ሄሳፊካ ቦላራ ሃይሲ ኑ አሻይ ኑኒ ሃይሳ ሎኦ ኦሶዛ ጎዳ ቦንቾስ ኦሊሺኒኔ ኑኒ ኦፋናሰ ኮይዛይሳ ኢዛሰ ቆንፌሲሺን ኢዚ ኑናራ ቢዲ ኦፋናሰ ዋሳ ኬላቲ ዶሪዳዴ።

20 ሃይሳ ኪያቴል አሜቲዳ ሚሻዛ ኑኒ ኦይኪሺን ኑ ቦላ አይኮ ቦርይካ ጋኮንታ ማላ ኑኒ ናጌቶስ።

21 ጋሶይካ ኑሰ ዋና ቆፋይ ጎዳ ሲንላን ጸላ ጊዶንታ አሳ ሲንላንካ ሎኦ ኦፋናሳ።

22 ዳሮ ዋዴ ዳሮ ሚሻን ፓጩቲዲ ሚኖ ጊዲዳ ኑ አሻ ቲቶሳራ ኑ ኢዛ ዩዲዳይ ሄሳሳ፤ ኢዛሰ ኢንቴ ቦላ ዲዛ አማኖይ ዳሮ ጊታ ጊዲዳ ጊሻሰ ኢዚ ሃኢ ኢንቴና ማዳናሰ ካሴፔ አሉ ኮዬሰ።

23 ኢንቴ ቲቶሳ ጊሻሰ ኤራናሰ ኮይኮ ኢዚ ኢንቴና ማዳናሰ ታናራ ኦሊዛዴ፤ ኢዛራ ኢሲፌ ቢዛ ሃንኮ አሻቲ ቃሴ ዋሳ ኬላቲ ባ ጊሻሰ ዩዲዳ ኪርሰቶሳ ቦንሻሰ ኤቂዳይታ።

24 ሄሳ ጊሻሰ ኢንቴ ኢሰታሰ ኢንቴ ሲቆ ቤሲቴ፤ ኢንቴ ሄሳሶ ሂሰቲኮ ኢንቴ ሲቆይኔ ኑ ኢንቴናን ጩቄቲዛ ጩቄቲሉ ጮ ሃዳ ጊዶንታይሳ ኢንቴ ዋሳ ኬላታሰ ቤሳንዴታ።

9

አማኒዛይታሰ ሚሻ ኬሶ

1 ዩሁዳን ዲዛ አማኒዛይታሰ ኬሲዛ ሚሻ ጊሻሰ ታ ኢንቴሰ ጸፋናሰ ኮሼና።

2 ኢንቴሰ አካያን ዲዛ አሳሰ ማዳና ሎኦ ቆፋይ ዲዛይሳ ታ ኤራዳ፤ «አካያ አሳይ ዚላይላፌ ኦይኪዲ ማዶሰ ጊጌቲዴሰ» ጋዳ ማቂዶኒያ አሳሰ ዮታዲሰ። ሃራፔካ ኢንቴ ማዳናሰ ኮዩዳ ሱሬ ቆፋይ ዳርታ ሎኦ ኦሶሰ ዴንፊሊዴሰ።

3 ሃይሳ ሃ ሃኖዛን ኑ ኢንቴናን ጩቄቲዛይሲ ጮ ሃዳ ጊዶንታ ማላ ሃይታ ኑ አሻታ ታ ኪታዲሰ፤ ኢንቴካ ታ ካሴ ኢንቴሰ ጊዳ ማላ ናጌቲ ኡቲቴ።

4 ማቂዶኒያ አሳቲ ታናራ ኢንቴኮ ቢሺን ኢንቴ ጊጌቶንታ ዲዛይሳ ቤኢኮ ኢንቴናን ጩቄቲዛይሳን ኑኒ ዩላታና፤ ኢንቴ ቃሴ ዳሮ ዩላታና።

5 ሄሳ ጊሻሰ ኢንቴ ካሴ ኢማና ጊዳይሳ ካሴቲዲ ጊጊሳና ማላ ኢንቴና ቆፍሳይሰ፤ አይሰ ጊኮ ሃይቲ አሻቲ ታፔ ካሴቲዲ ኢንቴኮ ጋካና ማላ ኮሺዛይሲ ታሰ ቤቲዴሰ፤ ሄሳሶካ ታኒ ቢዛ ዋዴ ኢንቴ ኢማናይሲ ጊጊ ኡቲዳዝ ጊዳና፤ ኢንቴካ ኢማናይሲ ዋልቃራ ጊዶንታ ዶሳን ጊዲዳይሳ ቤሳና።

6 «ጉሉ ዜሪዳ አሲ ጉሉ ሺሻና፤ ዳሮ ዜሪዳዴይ ቃሴ ዳሮ ካሉ ሺሻና» ጊዛ ቃላ ዩሺ ቆፒቴ።

7 ጸሲ ዶሲዛይ ባ ዶሳን ኢማዛዴ ጊዲዳ ጊሻሰ ኢሲ ኢሲ አሲ ኢማናሰ ባ ዋዚናን ቆፒዳሮ ኡፋይሳን ኢሞ አቲን ሞዴቲሼ ጮ ዋልቃራ ኢሞፎ።

8 ኡባ ዋዴ ሃኒዛ ኡባን ኢንቴ ኢንቴሰ ጊዲ ፓላሂዲ ሃራ ሎኦ ኦሶሰ ጊዳና ማላ ጸሲ ኢንቴሰ ባ አንጆ ጉጂ ኢማናሰ ዳንዳዬሰ።

9 ሄሲካ፡

«ማንቆታስ ኪያቴላን ኢሚዴስ፤
ኢዛ ጺሎቴሊ ሜርናስ ዴያና»
ጌቴቲ ጌሻ ማጻፋን ጸፌቲዳ ማላ፡፡

10 ዜሪዛዴስ ዜሬሊ፡ ማናስ ካል ኢሚዛ ጎዳይ ኢንቴ ዜሪዛ ዜሬላ ኢዚ ኬሂ ዳርሲ ኢማና፤ ኢዚ ኢንቴ ኪያቴላ ኦሶዛ ኣይፌ ኢንቴስ ዳርሳና፡፡

11 ኢንቴ ኪያቴላን ኢሞይሲ ኑ ባጋራ ኢስታ ጋኪዛ ኣሳቲ ጸስ ጋላታና ማላ ኢንቴ ኡባ ዋዴ ኪያቴላ ኢማና ማላ ጸሲ ኢንቴና ኡባሶራ ዱሬሳና፡፡

12 ሃይሲ ኢንቴ ኢሚዛ ኪያቴላ ኦሶይ ኣማኒዛይታ ሜቶ ማዶፔ ቦላራ ኣሳይ ጸሳ ዳርሲ ጋላታና ማላ ኦፊስ፡፡

13 ሃይሲ ኢንቴ ኪያቴላ ኦሶዚ ኢንቴ ከርስቶሳ ሚሺራቾ ቃላን ኣማኒዲ ኣማኔቲዳይታ ጊዲዳይሳ፡ ኢስታሲኔ ሃራታስካ ኢንቴ ኪያቴላ ኢሚዳይሳ ኤሪሲዛዝ ጊዲዳ ጊሻስ ኢስቲ ወሪካ ጸስ ጋላታና፡፡

14 ኢስቲ ቃሴ ጸሲ ኢንቴስ ኢሚዳ ጌታ ኪያቴላ ጋሶን ኢንቴና ሲቂዛ ጊሻስ ኢንቴስ ዋሳና፡፡

15 ኣሳ ቃላን ቆንጨሲሳፌ ቦላ ጊዲዳ ጸሳ ኢሞቴላ ጊሻስ ጸሲ ጋላቴቶ፡፡

10

ጳውሎሲ ባ ኦሶ ጊሻስ ኢሚዳ ቆፋ

1 ታኒ ጳውሎሲ ኢንቴናራ ዳሼ ኣሽኬ ጌቴታዲስ ሺን ታ ኢንቴፌ ሻኬቲሺን ቃሴ ኢንቴ ቦላ ጸሊዳዴ ጌቴቲዳ ታኒ ጳውሎሲ ከርስቶሳ ኣሽኬቴላኒኔ ኢዛ ሎኤቴላን ኢንቴና ዋሳይስ፡፡

2 ታኒ ኢንቴና ዋሲዛይ ታ ኢንቴኮ ሄ ቢዛ ዋዴ ኢንቴ ታና ጸላቴላን ሃሳይሶንታ ኣጋና ማላሳ፡፡ ኑኒ ኣሾ ቆፋን ሲሜሬቲዛ ማላ ኑና ጸሊዛ ኢሲ ኢሲ ኣሳታ ሲንላን ታኒ ጸላቴላን ሃሳያናስ ኮያይስ፡፡

3 ኑኒ ዲዛይ ሃይሳ ኣላሜዛ ቦላ ጊዲኮካ ኑ ኦሌቲዛይ ሃ ኣላሜዛ ኣሳ ኦላ ማላ ጊዴና፡፡

4 ኑ ኦላ ሚሻይካ ኦላ ሚጻ ላላናስ ዳንዳይዛ ጸሳ ዋልቃይ ዲዛይሳ ኣቲን ሃይሳ ኣላሜዛ ኦላ ቶራ ጊዴና፡፡

5 ጸሐኒ ኤሮንታ ማላ ጹጹ ጊዲ ዳንዲዛ ፓላማኔ ኦቶሬቴል ኑ ላሎሰ፤ አሳ ቆፋ ኡባ ዲኢ ኤኪዲ ኪርሰቶሳስ አዛዜታና ማላ ኦሶስ።

6 እንቲ አዛዜቴሊ ፖሌቲዛ ዋዴ አዛዜቶንታ አይ ሚሼካ ቃጸያናሰ ኑኒ ጊቤቲ ኡቲዶስ።

7 እንቲ ዴሊዛይ ካሬ ባጋራ ቤቲዛዝ ጸላ፤ ኦኒካ ታኒ ኪርሰቶሳስኮ ጊ አማኔቲኮ ዛሬሊ ቆፖ፤ ኦኒካ ኢዛ ማላካ ኪርሰቶሳይታ ጊዲዳይሳ ኢዛዴይ ዋዚናን ዋሶ።

8 ጎዳይ ኑስ አሚዳ ማታ ጊሻሰ ታኒ ኢዛን ጨቁኮካ ዬላቲኬ፤ ሄሲ ማታይ ታሰ አሜቲዳይ ኑኒ እንቲና ሚንፋናሰ አቲን ላላናሰ ጊዴና።

9 ታኒ ሃ ኪታን እንቲና ባቢሶስ ኦሊዛ ሚሳቶፖ።

10 ኦኔ ኤሪዛይ ኢሲ ኢሲ አሳቲ፥ «ጳጤሎሳ ኪታቲ ዴጶኔ ዋልቃማ፤ ጊዶ አቲን ኦቻን ዲዛ ዋዴ ኢዚ ላፋ፤ ኢዛ ሃሳያይካ ለቁቲዳይሳኮ!» ጊዛዝ ጊዳና።

11 ሄሳሶ ጊዛ አሳቲ ኑኒ ሃሆን ዲሼ ጸፊ ኪቲዳይሳሲኔ ቃሴ እንቲናራ ዲሼ ኑ ኦሊዛይሳ ጊዶን አይኮ ዲማቴሊ ባይንዳይሳ ሻኪ ኤሬቶ።

12 ጊዲኮካ ባርካ ባና ናሺዛ ኢሲ ኢሲ አሳታራ ኑና ኑርካ ጋሊ ጸላናሰ ዋይኮ ኢስታራ ኑና ጊሊሳናሰ ጸሎኮ፤ ኢስቲ ቃሴ ባርካ ባና ባናራ ጋሊ ዴሊዛ ጊሻሰ ኢስቲ ዩሺ ቆፐዛይታ ጊዴቲና።

13 ኑ ቃሴ እንቲኮ ጋካናሰ ጸሲ ኑስ አሚዳ ኦሶ ዛዋን ሲሜሬቶስ አቲን ዋጋፔ አሊ ጨቁቲዛይታ ጊዶኮ።

14 እንቲ ቃሴ ኑ ኦሊዛሶን ዲዛ ጊሻሰ ኪርሰቶሳ ሚሺራቾ ቃላ ታማርሳናሰ ኑ እንቲኮ ቢዳ ዋዴ ኑኒ ኑ ዛዋፔ አጲቤኮ።

15 ሄሳ ጊሻሰ ጸሲ ኑስ አሚዳ ዛዋፔ አጲዲ ሃራ አሳታ ኦሶን ጌሊዲ ዋጋፔ አጲ ጨቁቶኮ፤ ሄሳፌ ቦላራ እንቲ አማናይ ዲጫና ማላኔ ኑ ኦሶይካ ጸሲ ኑስ አሚዳ ዛዋን እንቲ ጊዶን አካናይሳ ናጎን ዶስ።

16 ሄሳ ጊሻሰ ኑ ሃራ አሲ ኦሊዛ ዛዋ አጲዲ ካሴቲዲ ኦሴቲዳ ኦሶን ጨቁቶንታ ዲሼ እንቲፌ ሄኒን ዲዛ ዴሬታሰ ሚሺራቾ ቃላ ዮታናሰ ዳንዳዮስ።

17 ጊዶ አቲን ጸሳ ማጸፋይ፥ «ጨቁቲዛ አሲ ጎዳን ጨቁቶ» ጊዴስ።

18 አሲ ጋላቲታናሰ ዳንዳይዛይ ጎዳይ ጋላቲኮ አቲን ባርካ ባና ጋላቲን ጊዴና።

11

ጳውሎስን ዋርዶ ሃዋሬታ

¹ ታ ጉላ ኤያቴላ አንቴ ዳንዲያና ማላ ታ ሂደታ ኦሳይሳ ሃያና ዳንዲይቴ።

² ኢሲ ጌሎንታ ጌሻ ጌላኦያ ባ ጌላኦቴላን ኢሲ አዚናሰ ጊጊዛ ማላ ታኒካ አንቴና ኪርሰቶሳሰ ጊግሲዳ ጊሻሰ ታ አንቴ ጊሻሰ ሎኦ ቆፋ ቆጋይሰ።

³ ሸሻይ ባ ጌሬራ ሄዋኖ ባሌሊዳይሳሉ ኦኔ ኤሪዛይ አንቴ ቆፋይካ ሞሬቲን ኪርሰቶሳሰ ዲዛ ሱሬኔ ጌሽ ጊዲዳ አማኔቴላ አንቴና አጋጋንዴቶ ጋዳ ታ ሂርጋይሰ።

⁴ ኢሲ አሲ አንቴኮ ዪዲ ኑ ካሴ አንቴሰ ሳባኪዳይሳ ጊደንታ ሃራ ዬሱሳ ሳባኪኮ ዋይኮ ካሴ አንቴ ኤኪዳ አያና ጊደንታ ሃራ አያና ኤኪኮ ዋይኮ ካሴ አንቴ ኤኪዳ ሚሺራሾ ቃላ ጊደንታ ሃራ ሚሺራሾ ቃላ ኤኪኮ ጮ ሚላ አንቴ ጸኔቲዳታ ጉሳ።

⁵ ጊዲኮካ ታኒ ሃይታ ጊታ ሃዋሬታፔ አይኮንካ ጉጺዛ ታሰ ሚሳቴና።

⁶ ሃሳያን ጨንጫ ጊደንታ አጊኮካ ታሰ ኤራይ ፓጪቤና፤ ሄሳ ኑኒ አንቴሰ ዲማ ዲማ ኦጌራ ቆንጩን ኤሪሲደሰ።

⁷ ታኒ አንቴሰ ጸሳ ሚሺራሾ ቃላ ዳሞዛይ ባይንዳ ሳባኪዳይኔ አንቴና ጶቄ ሂሰታናሰ ታኒ ታና ካዉሺዳይሲ ኦኔ ኤሪዛይ ታሰ ናጋራ ጊዲ ቆዴቲዳሻ?

⁸ አንቴሰ ኦላናሰ ሃንኮ ዋሳ ኬላታፔ ታኒ ማዶ ኤኪዳይሲ ኢሰታፌ ሺሻ ኤካዳኮ።

⁹ ታኒ አንቴናራ ዲሺን ታና ሜቲን ማቂዶኒያፔ ዪዳ አሻቲ ታሰ ኮሺዛዛን ታና ማዲዳ ጊሻሰ ኦናሰካ ቶሆ ጊዳቤኬ፤ ሃኖ ጋካናሰካ ኣይ ሚሻንካ አንቴሰ ቶሆ ጊዳቤኬ፤ ሲንላፊካ ታ አንቴሰ ቶሆ ጊዲኬ።

¹⁰ ኪርሰቶሳ ቱማቴሊ ታናን ዲዛ ጊሻሰ ታኒ ጩቄቶንታ ማላ ታና ዲጊዛይ አካያ ዴሬን ኦኒካ ባ።

¹¹ ሄሳሰ ጋሶይካ አዜ? ታኒ አንቴና ሲቆንታ ጊሼ? ታ አንቴና ሲቂዛይሳ ጸሲ ኤሬሰ።

¹² ሄይቲ ዋርዶ ሃዋሬቲ፥ «ኑኒካ ኢሰታሉ ኦሶስ» ጊሼ ኢሰቲ ጩቄቲዛይሳ ዲጋናሰ ታ ሃኢ ኦሊዛይሳሉ ሲንላፊካ ኦላና።

¹³ ሄይታንታ ማላ አሳቲ ኪርሰቶሳ ሃዋሬታ ሚሳታናሰ ባርካ ባና ላሚዛ ዋርዳንቻ ሃዋሬታኔ ባሌሊዛ ኦሳንቻታ።

14 ሄሲካ ዳሮ ማላሊሲዛዝ ጊዴና፤ ጸላኤይካ ባና ፖኦ ኪታንቻ ሚሳቲሲዲ ላሜቲስ።

15 ሄሳ ጊሻሰ ሄይቲ ጸላኤ ኦሳንቻቲ ሃንኮ ጸሎ ኦሳንቻታ ሚሳታናሰ ባርካ ባናቴላ ላሚኮ አይኮካ ማላሊሴና፤ ወርሴላን ኢስቲ ባ ኦሶ ዋጋ ኤካና።

ጳውሎሲ ሃዋራቲያ ጋሶን ቤኢዳ ዋዬ

16 ኦናሰካ ታኒ ኤያ ጊዲዳዝ ሚሳቶፖ ጋዳ ቃሴካ ዮታዲሰ፤ ታ ኢስታሰ ኤያ ሚሳቲኮካ ጉላ ዋዴሰ ታ ጨቄታና ማላ ታና ኢንቴ ኤያ ማላ ቆዲቲ።

17 ታኒ ሄሳሉ ዶና ኩንላ ሃሳይዛይ ጎዳ ሸኔ ማላ ጊዶንታ ኤያ አሳ ማላ ጊዳዳኮ።

18 ዳሮቲ ባ አሾ ቆፋን ጨቄቲዛይሳሉ ታኒካ ጨቄታና።

19 ኢንቴ ቃሴ ዩሺ ቆፒዛይታ ጊዲዳ ማላ ሃንኮ ኤያታ ኡፋይሳናሰ ዳንዳዬታ።

20 ሄሳሉካ ኦኒካ ኢንቴና ባሰ አይሌሲኮኔ ኦኒካ ኢንቴና ቦንቂኮ፣ ኦኒካ ኢንቴናን ጎኤቲኮ፣ ኦኒካ ኢንቴና ሌቂኮ፣ ኦኒካ ኢንቴሰ ሻጋላን ባቂኮ ኢንቴ ዳንዳዬታ።

21 ኢዚ ታና ዩላሲዛዝ ጊዲኮካ ሃይታ ሃ ሃሮታ ኦላናሰ ኦኒ ሚኖ ጊዶንታይሳ ታኒ ኢንቴሰ ቆንጨሳይሰ።

ጊዶ ኦቲን ኦኒካ ጨቄታናሰ ጸሊኮ ታኒካ ኢዛሉ ጸላዳ ጨቄታና፤ ታኒ ሄሳ ጊዛይ ሃኢካ ኤያ ጊዳዳኮ።

22 ሄይታንቲ ኢስቲ ኢብራዌ አሳቴ? ታኒካ ኢብራዌኮ! ኢስቲ ኢስራኤሌ አሳቴ? ታኒካ ኢስራኤሌ አሳኮ! ኢስቲ ኢብራሃሜ ዜሬላቴ? ታኒካ ኢብራሃሜ ዜሬሊኮ!

23 ሄይታንቲ ከርሰቶሳ ኦሳንቻቲ? ታኒ ቃሴ ኢስታፌ ቦላራ ከርሰቶሳሰ ኦሊዛዴ፤ ታ ሄሳሉ ጊዛይ ጎሻ ማላ ጊዳዳኮ! ታኒ ኢስታፌ ዳሮ ዋዴ ኦሶን ዳቡራዲሰ፤ ዳሮ ዋዴ ቃሼታዲሰ፤ ዳሮ ዋዴ ጋራፌታዲሰ፤ ዳሮ ዋዴ ሃይቆሰ ጋካዲሰ።

24 ኢቻሹቶ ሄቹ ታማኔ ኡዱፋን ጹርቃፌ አይሁዳታን ጋራፌታዲሰ።

25 ሄቹቶ ዱርቃን ቡኬታዲሰ፤ ኢሲቶ ሹቻን ጫዳታዲሰ፤ ሄቹቶ ማርካቤ ጊዶን ታ ቦላ ሜቶይ ጋኬዴሰ፤ ኢሲ ኦማርሲኔ ኢሲ ጋላሰ አባ ጊዶን ጋሞኢዲሰ።

26 ታ ሄሜታ ዳሮ ጋሶን ሃላ ኪጸይኔ ዲኦይ፣ ፓንጋታፔ ሜቶይ ታና ጋኪዴሰ፤ ታ ቆሞ አይሁዳ አሳቴኔ አይዛቤታፔ ዋዬይኔ

ሜቶይ ታና ጋኪዴስ፤ ካታማንካ፣ ባዞንካ አባ ቦላንካ ታና ሜቶይ ጋኪዴስ፤ ሄሳቶካ ዋርዶ አማኒዛይታ፤ ሜቶይ ታና ጋኪዴስ።

27 ዳሮ አሳ ዳቡራዲስ፤ ዳሮ ዋዴ ጲሰካቤኬ፤ ጋፋኒኔ ሃሳ ሳሞን ዋዴታዲስ፤ ዳሮ ዋዴ ሚዛ ካሊ ታስ ጳይዴስ፤ ሜሳይኔ ካሎቴሊ ታና ጋኪዴስ።

28 ታኒ ሃራ ሚሽ ቆፖንታ፣ ጋላስ ጋላስ ታና ቆፍሲዛይ ዋሳ ኬላታ ኡባ ጊሻስ ቆፒዛ ቆፋ።

29 ኢሲ አሲ ዳቡርሺን ታኒ ኢዛራ ዳቡርንታ አይዴ አጋዲና? ኢሲ አሲ ናጋራን ኩንዲሺን ታ ቃሴ ኢዛ ሃንቄቶንታ አይዴ አቆ ኤራዚና?

30 ጨቄታናስ ኮሺዛዝ ጊዲኮ ታ ጨቄታናይ ታ ዳቡራንቻ ጊዲዳይሳ ታና ቤሲዛ ሚሻን ጨቄታይስ።

31 ሜርናስ ጋላቴቲዳ ጎዳ ዬሱስ ኪርስቶሳ አዋ ጸሲ ታ ዋርዶቶንታይሳ ኤሬስ።

32 ታኒ ዳማሰቆ ካታማን ዲሺን ካዋ አርሲጸሲዮሳ፤ ጋርሳራ ዴሬ አይሲዛይሲ ታና ኦይካናስ ኮዪዲ ሄ ካታማ ፔንጌታ ዛቤታን ናጊሲዴስ።

33 ጊዲኮካ አሳይ ታና ኬሼን ዬጊዲ ሄ ካታማ ጊምቤ ማስኮቴራ ዱጌ ዋሊ ዬዲን ኬሳ ኤካ አታዲስ።

12

ጳውሎሲ ቤኢዳ አጁታ

1 ጨቄቴላን አይኮ ጎአይ ባይንዳ አጊኮካ ጨቄታናስ ኮሺኮ ጎዳይ ታስ ቆንጨሲ አሚዳይሳኒኔ ኢዚ ቤሲዳ አጁታን ታ ጨቄታና።

2 ኪርስቶሳስ ጊዲዳ ኢሳዴ ታ ኤራይስ፤ ሄ አዴዚ ታማኔ አይዱ ላይሳፌ ካሴ ሄሻንላ ሳሎ ኤኬቴ ቢዴስ። (ኢዚ ኤኬቴዳይ ባ አሾራ ጊዲን ዋይኮ አሾራ ጊዶንታ አጊን ታ ኤሪኬ ሺን ጸሲ ጊዲኮ ኤሬስ።)

3 ጊዲኮካ ኢዚ ባ አሾዛራ ቢን ዋይኮ ሜላ ቢን ታ ኤሪኬ፤ ጸሲ ጊዲኮ ኤሬስ።

4 ኢዛዴይካ ፑዴ ጋናቴ ኤኬቴዲ አሳ ቃላን ቆንጨሳናሲኔ አሲ ጋናስ ዳንዳዮንታዝ ኢዚ ሲዬዴስ።

5 ታኒ ሄሳ ማላ አሳን ጨቄታይስ፤ ታ ሁኤስ ጊዲኮ ታ ዳቡርሳፌ ሃራ ታ ኢዛን ጨቄታና ሚሺ ታስ ዴና።

6 ሂሳቲን ታኒ ቱማ ሃሳይዛ ጊሻሰ ጨቁታናሰ ኮይኮካ ታ ኤያ ጊዲኬ፤ ጊዶ ኣቲን ኦኒካ ታ ቦላ ባ ቤኢዛዛፔኔ ታፔ ሲዩዛይሳፌ ቦላራ ቆፖንታ ማላ ጋዳ ጨቁታናፔ ናጌታይሰ።

7 ሃይታ ታሰ ቆንጨዳ ጌታ ሃኖታ ጋሶን ታኒ ኦቶሬቶንታ ማላ ታ ኣሳቴላ ኣጉንላ ማላ ጫዲዛ ሳኮይ ታሰ ኢሜቲዳሰ፤ ሄሲካ ጸላኤፔ ከቲቲዲ ታና ጫቻን ዋዪሲዲ ታ ጨቁቶንታ ማላ ዲጌሰ።

8 ሃይሲ ታና ዋዪሲዛይሲ ታፔ ኪቻና ማላ ታኒ ጎዳ ሄቡቶ ዋሳዲሰ።

9 ጊዶ ኣቲን ጎዳይ፥ «ታ ዋልቃይ ኩሜላ ጊዲ ቆንጨናይ ኔ ዳቡርሳን ጊዲዳ ጊሻሰ ታ ኪያቴላ ኔሰ ጊዳና» ጊዳሰ፤ ሄሳ ጊሻሰ ኪርሰቶሳ ዋልቃይ ታ ቦላ ጊዳና ማላ ኣይ ዋዴፔካ ቦላራ ታኒ ዳቡርሺን ሄ ዋዴ ኡፋይሳን ጨቁታናሰ ዶሳይሰ።

10 ታኒ ዋልቃ ዳሚዛይ ዳቡርዛ ዋዴ ጊዲዳ ጊሻሰ ታ ኪርሰቶሳ ጊሻሰ ዳቡርሺን፥ ጫዬቲሺን፥ ሜቶቲሺን፥ ጎዴቲሺን፥ ሙዞቲሺን ታና ኡፋይሴሰ።

ቆሮንቶሴ አሳ ጊሻሰ ጳውሎሳ ቆፋ

11 ታኒ ኤያ አሳ ማላ ሃሳያዲሰ! ታኒ ሄሳሶ ሃሳያና ማላ ኦሊዳይ ኢንቴናኮ! ኢንቴ ታና ጋላታናሰ ቤሴስኮ ሺን ታ ኦናኮኔ ኤሬቶንታዴ ጊዲኮካ ሃንኮ ጌታ ጌቲቲዳ ሃዋሬታፔ ታኒ ኣዛንካ ጉጺኬ።

12 ታኒ ቱሙ ሃዋሬ ጊዲዳይሳ ኤሪሲዛ ሃኖቲ ታ ኢንቴናራ ዳሼ ዳንዳያን ፖሊዳ ኦሶታ፤ ሄይቲካ ማላታታ፥ ጌታ ኦራላ ሚሼታኔ ማላሊሲዛ ኦሶታ።

13 ታኒ ኢንቴሰ ቶሆ ጊዶንታ ኣጎሪፔ ኣቲን ሃንኮ ሃራ ዋሳ ኬላታፔ ኢንቴና ኣዛን ፓጪሳዲና? ሄሲካ ሞሮ ጊዲኮ ኢንቴ ታና ማሪቴ።

14 ታኒ ሄ ኢንቴኮ ባናሰ ጊጌቲሺን ሃይሲ ሄቫንላ፤ ታኒ ኢንቴሰ ቶሆ ጊዳናሰ ኮይኬ፤ ታኒ ኢንቴና ኮያይሰ ኣቲን ኢንቴ ሚሻ ኮይኬ፤ ኣዋቲ ናይታሰ ሚሽ ሺሼቴሰ ኣቲን ናይቲ ኣዋታሰ ሚሽ ሺሺ ኤሬቴና።

15 ታኒ ኢንቴ ጊሻሰ ታናካ ታሰ ዲዛዝ ወርሳ ኢንቴሰ ኣላ ኢሚዳኮ ታና ዳሮ ኡፋይሴሰ፤ ሂሰቲን ታኒ ኢንቴና ሃይሳ ማላ ዳሮ ሲቂሺን ኢንቴ ቃሴ ታና ዋኒ ጉላራ ሲቂቲ?

16 ኣይ ጊዲኮካ ታ ኢንቴሰ ቶሆ ጊዳቤኬ ሺን ኢንቴሰ ታ ኢንቴና ጮ ጌኔን ባሌላ ኦይኪዳዝ ሚሳቴሰ።

17 ታ አንቴኮ ኪታ ዬዲዳ አሳታፔ አሳዴ ባጋራካ አንቴፌ ጎኤታዲና?

18 ቲቶሲ አንቴኮ ባና ማላ ታ ኢዛ ዋሳዲሰ፤ ሄሳ ኑ አሻዛካ ኢዛራ ጋሳ ዬዲዲሰ፤ ሂሰቲን ቲቶሲ አንቴፌ አይኮ ጎኤቲዴ? ታኒኔ ኢዚ አንቴሰ ኦሉዲይ ኢሲ ዋዚናን ጊዴኔ? ካሴ ኑ ሃኖይ ኢሲ ማላ ጊዴኔ?

19 አንቴ ወሪካ ሃኢ ጋካናሰ ቆፒዛይ ኑ አንቴ ሲንላን ኑና አሻናሰ ሃኒዛ ሚሻ ማላ ጸሌቲ? ኑኒ ኪርሰቶሳን ጊዲዲ አንቴሰ ዮቴዛይሲ ጸሳ ሲንላና። ታ ሲቆቶ! ኑ ሃይሳ ኡባ ዮቴዛይ አንቴና ጎኣናሰ ጊዲኮ!

20 ታኒ ሄ ቢዛ ዋዴ ኦኔ ኤሪዛይ አንቴ ታ ኮዬዳ ማላ ሃኖንታ ኣጊኮ ታኒካ አንቴ ኮይዛ ማላ ጊዶንታ ዳሼ ጋጌታኔሻ ጋዳ ሂርጋይሰ፤ ሄሳቶካ አንቴ ጊዶን ኦሺ፣ ቃናቴቴሉ፣ ሃንቆይ፣ ዙፔቴሉ፣ አሳ ሱንላ ኢሶይ፣ ዘጊርሲ፣ ኦቶሬቴሉኔ ካቺ ዱሰ ኣጌና ጋዳ ሂርጋይሰ።

21 ታኒ ቃሴካ ሄ አንቴኮ ቢሺን ኦኔ ኤሪዛይ ታ ጎዳይ ታና አንቴ ሲንላን ካወሻንዴ ጋዳ ሂርጋይሰ። ሃይሳፌ ካሴ ናጋራ ኦሉዲ ሄ ኦሉዳ ቱናቴላን፣ ላይማኒኔ ጮ ሜላ ዬዳ ዱሳሰ ማርቴላን ጌሎንታ አሳታ ጋሶን ታ ሙዙቴላን ዋቋንዲና ጋዳ ሂርጋይሰ።

13

ወርሴላ ዞሬኔ ሳሮካ

1 ሂሰቲኮ ታኒ አንቴኮ ቢሺን ሃይሲ ታሰ ሄሻንሶ፤ አይዴካ ጊዲን ዮኦይ ሚኒዛይ ናምኡ ማርካን ዋይኮ ሄሹ ማርካና።

2 አንቴና ቤያናሰ ታ ናምኣንሶ ቦይሳን ታ አንቴናራ ዳሼ አንቴ ናጌታና ማላ ታ አንቴሰ ሚንላ ዮታዲሰኮሺን፤ ሃኢካ ቃሴ ሃሆን ዳዳ ሃይሳፌ ካሴ ናጋራ ኦሉዲይታሲኔ ሃንኮይታሰ ሚንላ ዮታይሰ፤ ሃኢ ታ አንቴኮ ሄ ሲማ ቢኮ ኢሰታፌ ኦናሰካ ሚሼቴኬ።

3 ሄሲካ ቃሴ ታናን ጊዲዲ አንቴሰ ዮቴዛይ ኪርሰቶሳ ጊዲዲይሳ አንቴ ሻኪ ኤራናሰ ኮይዛይሳ ቤሴሰ፤ አንቴ ኣቻን ዲዛ ኪርሰቶሲ ዋልቃማ ኣቲን ላፋ ጊዴና።

4 ኢዚ ማሰቃሌ ቦላ ካቂቲዲ ዳቡራን ሃይቂኮካ ሃኢ ቃሴ ጸሳ ዋልቃን ፓጸ ዴሰ፤ ኑኒካ ኢዛራ ላፋታ ጊዲኮካ አንቴ ጊሻሰ ጊዲ ጸሳ ዋልቃን ሚኒ ዶሰ።

5 አንቱ አማኖን ሚኒ ዲዛኮኔ ኤራናስ አኔ አንቲርካ አንቲና ፓጪ ጸሊቲ፤ ዩሱስ ኪርስቶሲ አንቲናን ዲዛይሳ ሻኪ ኤሪቤኬቲ? ሃሳዎ ሃኖንታ አጊኮ አንቱ ፓጪን ኩንዲዴታ ጉሳ።

6 ኑኒ ፓጪን ኩንድንታይሳ አንቱ ሻኪ ኤራና ጋዳ ሂዶታ አላይሰ።

7 አንቱ ኢታ ሚሽ ኦሶንታ ማላ ኑኒ ጸሰ ዋሶስ፤ ኑኒ ዋሲዛይካ ኑ አይኮካ ዳንዲይዛይታ ጊዶንታ አጊኮካ አንቱ ኡባ ዋዴ ሎኦ ኦሶ ኦላናፔ አቲን ኑ ጎባቴላ አንቲና ቤሳናስ ጊዴና።

8 ኑኒ ቱማቴላስ ኦሶስ አቲን ቱማፔ ካሬራ አይኮካ ኦላና ዳንዳዮኮ።

9 ኑኒ ዳቡራንቻታ ጊዲን አንቱ ቃሴ ሚኖታ ጊዲሺን ኑና ኡፋይሴሰ፤ ኑ ዋሳይ አንቱ ቦላ ዋሶይ ባይንዳይታ ጊዴና ማላሳ።

10 ታኒ ሃይሳ አንቲስ ዩዲዛ ኪታዛ አንቲፌ ሃካ ዳሼ ጸፊዳይ ሃሳ ጊሻሳ፤ ሃሳ ማላን ታ አንቲኮ ቢዛ ዋዴ ታሰ ጎዳይ ኢሚዳ አዋቴላን ታ አንቲና ዋዪሲኬ፤ ጎዳይ ታሰ አዋቴላ ኢሚዳይ አንቲና ሚንላናስ አቲን ላላናስ ጊዴና።

11 አኔ ሃኢ ታ ኢሻቶ! ሳሮ ዲቲ፤ አንቱ ዱሳ ሎኤሊቲ፤ ታ አንቲና ዞርይሳ ካሊቲ፤ አሳይ ኢሶይ ኢሳራ ሲጌቲቲ፤ ሳሮን ዲቲ፤ ሲቆኔ ሳሮ ጎዳይ አንቲናራ ጊዴና።

12 ሲቆ ዩሬቴላ ዩሬቲዲ ኢሶይ ኢሳራ ሳሮኬቲቲ።

13 አማኒዛ አሳይ ዉሪካ አንቲና ሳሮ ጌሰ።

14 ጎዳ ዩሱስ ኪርስቶሳ ኪያቴሊ፥ ጸሳ ሲቆይኔ ጸሎ ኢያና ኢሲፌቴሊ አንቲናራ ኡባታራ ጊዶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b